



সংসদ এলাকায় বিশৃঙ্খলায় প্রকৃত জুলাই যোদ্ধারা জড়িত নয়: সালাহউদ্দিন



সংগৃহীত ছবি

সংসদ ভবন এলাকায় জুলাই সনদ স্বাক্ষর অনুষ্ঠানকে কেন্দ্র করে যে বিশৃঙ্খলা ঘটেছে, তাতে প্রকৃত জুলাই যোদ্ধারা কোনোভাবেই জড়িত নয় বলে মন্তব্য করেছেন বিএনপির স্থায়ী কমিটির সদস্য সালাহউদ্দিন আহমদ। তিনি বলেন, ওই ঘটনার পেছনে ছাত্র নামধারী কিছু ব্যক্তি ও আওয়ামী ফ্যাসিবাদী অনুপ্রবেশকারীদের ভূমিকা থাকতে পারে।

রোববার (১৯ অক্টোবর) গুলশানে বিএনপি চেয়ারপারসনের কার্যালয়ে আয়োজিত এক সংবাদ সম্মেলনে তিনি এ মন্তব্য করেন।

সালাহউদ্দিন আহমদ বলেন, “দীর্ঘ ধারাবাহিক সংগ্রামের ভিত্তিতেই ছাত্র গণঅভ্যুত্থান সংঘটিত হয়েছে, যা আমাদের জাতীয় জীবনের এক ঐতিহাসিক শক্তি। এর সঙ্গে জড়িত ব্যক্তি ও সংগঠনকে সম্মান জানানো হয়েছে যাতে কেউ বিতর্কিত না হয়। বিএনপিকে ওই অভ্যুত্থানের বিপরীতে দাঁড় করানোর কোনো চেষ্টা সফল হবে না।”

ক্ষমা চাওয়ার বিষয়ে নাহিদ ইসলামের মন্তব্যকে ইতিবাচক আখ্যা দিয়ে তিনি বলেন, “এটি একটি দায়িত্বশীল পদক্ষেপ। দেশে যে কিছু কিছু ঘটনা একই সূত্রে গাঁথা—তা ইঙ্গিত দেয়, কেউ অস্থিতিশীলতা সৃষ্টির চেষ্টা করছে।”

সংবাদ সম্মেলনের শেষে তিনি বলেন, “বিএনপির বক্তব্য বিকৃত বা খণ্ডিতভাবে না তুলে ধরে, সম্পূর্ণ প্রেক্ষাপটে প্রচার করার অনুরোধ করছি।”